

PTPTN: Tubuhkan pusat sehenti di setiap negeri
Utusan Online
December 4, 2011

KUALA LUMPUR 3 Dis. - Pergerakan Puteri UMNO mencadangkan penubuhan sebuah pusat sehenti di setiap negeri bagi memudahkan para pelajar mengurus dan melunaskan pinjaman Tabung Pendidikan Tinggi Nasional (PTPTN).

Wakilnya, Dayang Maimunah Sidek berkata, mereka yang telah mendaftar dengan pusat tersebut akan dikenal pasti dan dihubungkan terus kepada agensi-agensi yang bertanggungjawab untuk memastikan pembayaran pinjaman dibuat melalui potongan gaji.

"Pusat ini penting bagi mengurangkan beban pelajar khususnya yang masih belum mampu. Kalau dah mampu (membayar) maka bertanggungjawablah," katanya ketika membahaskan usul agama, pendidikan dan sosial pada Perhimpunan Agung UMNO 2011 di Pusat Dagangan Dunia Putra di sini hari ini.

Sementara itu, masyarakat diminta agar tidak menyekat pasangan yang mahu berkahwin pada usia muda kerana ia boleh mencegah gejala sosial termasuk kelahiran anak luar nikah.

Wakil Melaka, Datuk Hasan Rahman berkata, sudah sampai masanya masyarakat Islam di negara ini kembali mencontohi masyarakat dahulu yang bahagia berkahwin pada usia muda hingga mempunyai berbelas-belas anak termasuk yang berjaya menjejakkan kaki ke menara gading.

"Hukum tidak melarang, jadi mengapa kita hendak menyekat?"

"Biarpun mereka terpaksa pergi ke sekolah dalam keadaan mereka mengandung misalnya, tetapi sedikit-tidaknya landskap baru di sekolah nanti dapat kita lihat di mana anak murid mengandung, cikgu pun mungkin mengandung juga," katanya ketika membahaskan usul yang sama.

Hasan berkata, langkah mengizinkan kahwin muda adalah lebih penting kepada pasangan yang sudah menemui calon dan mahu mendirikan rumahtangga.

Hakcipta Terpelihara © UTUSAN MELAYU (M) BERHAD

Source:

http://ww2.utusan.com.my/utusan/special.asp?pr=umno2011&y=2011&dt=1204&pub=umno2011&sec=Berita&pg=bu_05.htm